

N. C
RENZE
0 0 9
34



1009.34

DE MOTV CORDIS
Mœchanicum Theorema
AD ILLUSTRISSIMVM D.
ANTONIVM
MAGLIABECHIVM.

IOANNES BAPTISTA SCARAMVCCIVS.

EO peruenit, Illustrissime virtutum Mœcenas; Neoterico-
rum scribendi solertia, vt duce anatomica autopsia re-
vera ostenderet iuxta Hippocratis Oraculum, cor mi-
sculum esse. Cæterum quæ de motu, eiusque causa pro-
feruntur, occultata ferè latent tenebris, satisque ostendunt cum
Platone *inventionis difficultatem ignorantiam accusare*. Interea co-
gitanti mihi libertatem phylosophandi nemini denegatam, ve-
nerat in mentem, quæ de cordis motu fueram meditatus, Ami-
cis proferre, eo præcipuè titulo, vt corrigantur. Ipsi etiam Bac-
cho, referente Plutarco, sæpenumerò sacra Nephalia fuisse pera-
cta, eapropter poterit Amicorum humanitas, quibus scribo, in-
sultum hoc Theorema æquo animo perlegere: Dabitur enim
occafio, vt quibus minùs arridebunt, quæ ero dicturus, melio-
ra in medium proferant. Non inficior, me quondam diuersam
de motu cordis sequutum fuisse sententiam, ast neminem non
ignoro latere, *eas esse cum Plutarco omittendas opiniones, quorum
habitus serua fecit nostra iudicia*: Et quamuis multi aliorum moni-
menta venerentur eo titulo, quod Magister dixerit, tamen quia
questio veritatem venatur, vt dicit Tilius, nullum est inconue-
niens, licet Procures diuersimodè senserint, probabiliorẽ per-
scrutari opinionem; *Vtinam quidem*, vt loquar cum Seneca, ve-
neremus omnia, & inoperta, ac confessa veritas esset, nihil ex decre-
tis mutaremus; nunc autem veritatem cum eis, qui docent, querimus.

Intercà leuissimam hanc meam lucubrationem tuo Nomini
volui innixam, vt virtutis tuæ suffula splendore faceret Amico-
rum tuorum lacerationis tyrannidem elugiat.

A



Verum circa ea, quæ tuis laudibus essent merito subiicienda Heracleti partes tuebor, nam cum sapientissima tua humanitas armonico virtutum omnium sate' litio ditata sit assueta in Reipublicæ litterariæ arena encomiorum laudibus extolli, fortunæ, & gloriæ erarium in Tui laudationem exutum depræhendi. A mœchanicis legibus differendi fundamentum exprobram, conscius nimirum quœnlibet cõfiteri debere ad nostri corporis economiam rimandam nullam viam plus conferre, quàm mœchanicam, cum Deus disposuerit omnia *in numero, pondere, & mensura*.

Viguit in Republica medica idealis facultatum conceptus, vigetque per consequens apud quamplurimos cordis motum omnino promoueri à facultate vitali, licet re vera facultatis nomen nil aliud sonet, quantum vox vox, prætereaque nihil. Quis amabò non videt dummodo libertatem phylosophandi non amiserit in nostro corpore, considerari tantum debere, & animam rationalem, & corpus, ita vt illa sit substantia spiritalis, & vera forma, per quam homo constituatur talis; illud verò sit aggregatum quoddam ex pluribus organis concurrentibus in structura organizatum corpus construere automatis nimirum adinstar, continereque in se & spiritus, & humores; illos vi motiua, eaque celeri præditos, hos in debita fluiditate, & miscela constitutos, vt pro data proportionatarum viarum structura perennem motum obtinentes armonicum cum spiritibus, & organis corpus construere valeant. Ex veritatis alea his depromptis omnino asserimus cor non moueri à facultate, quia facultates excludimus: Etenim cum nomine facultatis eam concipiant vim, & aptitudinem animæ, media qua aptitudine per corporis organa tanquam per instrumenta anima agit, & functiones exercet, examinare nos cogit occasio, num talis aptitudo dicat tantum animam, vel importet solum corpus, vel determinet quid distinctum ab utroque; si dicit tantum animam, motus cordis posset moderari pro diuerso voluntatis imperio; Ast velit, nolit anima cor semper mouebitur, arteriæ semper pulsabunt, secretiones recrementorum semper fient: si attingit corpus, ergo nihil dicit præter organum; Vndè dabitur superflua facultatum nomenclatura: Si verò importat quid distinctum nihil infertur, cum non assignetur, in quo consistat: Etenim istud distinctum, vel erit quid spirituale, & erit anima, vel erit quid materiale, & erit corpus.

3

Non desinunt Aduersarij repetere facultates omnino importare potentiam animæ ad agendum ubique præsentis, cum tota sit in toto, & tota in qualibet parte corporis, dummodo apta existant instrumenta, sed eadem redit difficultas, qua saluari non potest, cur multæ operationes non possent cohiberi ad nutum voluntatis, si facultates, à quibus supponuntur operationes profluere, vel animam, vel animæ potentiam dicerent: Possum namque motum manus cohibere, accelerare, & variare pro diuersa volitione, quia re vera ab animæ imperio proficiscitur motus manus: Imò cum idem operandi modus in cunctis animalibus exerceatur, quin ab animâ rationali, & ab eius potentia proficiscatur, cur in homine ad animam referunt eam actionem, quæ non tam grande agnoscit principium in brutis?

Cœcâ necessitatem imponunt animæ tanquam debeat esse auctrix eorum, quæ inscia anima, exequuntur, & summe demiror, quod proferant, animam totam esse in toto, & totam in qualibet parte, vt præter conceptum quidditatum spiritualitatis imponentis indiuisibilitatem, & extensionis negationem, sic concipiendâ quoque miraculosa existentia in nostro corpore.

Neque enim repugnat ad denegandam animæ extensionem suæ coextensionem, vt dicunt, quod Anima sit vera forma substantialis hominis, iuxta decretum sacrosancti Concilij Vniuersalis, nam licet sanctè sentiam animam rationalem esse veram formam substantialem hominis; non infertur ex hoc totam esse in toto, & totam in qualibet parte: Etenim corpus non est homo iuxta Platonis assertum, eo quod aliud est vtens, aliud quo vitur; si igitur homo vitur suo corpore, sequitur, quod corpus non sit homo. Neque corpus, & anima constituunt hominem, nam ex duobus principijs, quorum vnum est vtens, alterum quo vitur concipi non potest, quod cum corpus sit quo vitur homo, debeat corpus conceptum habere quidditatum hominis; Adeoque semper stat, quod sola anima sit homo; si ergo sola anima est homo, quin sit tota in toto semper verificabitur animam esse formam substantialem hominis, quia anima sola est homo.

Merito ergo multi cum Platone in parte cerebri animæ sedem agnoscunt, cum in cerebro animæ operationes exerceantur: Hinc Philo hæbreus duas contemplatur animas in homine, vnâ carnis, per quam homo animal sit, & hanc esse sanguinem, vt in brutis, alteram hominis, qua homo est, & hanc esse illud spirituum incorporeum, separabile, & æternum, subditque Moysis fuisse;

se assertum, *illud inspiratum esse in faciem*, non esse per totum corpus dispersum, ut sanguis, sed sublimem corporis partem tenere, quo superna contempletur.

Cum ergo inscia anima operationes nostri corporis naturales exerçantur, omnino fatendum singulas operationes præscindendo à voluntarijs, merè exequi sine potentia animæ, & per consequens sine facultate; adeoque totum peragi mœchanicè, hoc est per talem organorum structuram, & per talem spirituum, & fluidorum motum, quin ergo fiat recursus ad facultatem expultricem, & attractricem, motus fluidorum per propulsionem promouetur iuxta Platoniam doctrinam, quam propulsionem vocant motum peristalticum: Prout enim fluida distractionem fibrarum promouent, sic fibræ præ actiuitate elastica spontè se contrahentes fluidorum promouent motum, scriptum nanque reliquit Plato, *quod præter naturam coactum est, secundum naturam renititur, & sese renocat in contrarium*.

His suppositis excludentes facultatem vitalem, qua motus cordis peragatur, ut alias reijcere valeamus opiniones, præcipuè eas, quæ probabiliores dijudicantur, & ut nostrum valeamus comprobare assertum, proponamus obseruationem, qua longo temporis interuallo vidimus, motum cordis è viperis quamplurimis exempti, cuius rithmus hoc modo procedebat.

Quando à flaccescencia auriculæ vigorabantur, tunc cordis substantia flaccescens, & elongata depræhendebatur, taliter ut quando auriculæ ultimò cessabant à vigoratione, tunc primò cor vigorari depræhenderetur, in quo actu vigorationis cordis micro versùs basim tendebat, quæ basis ne dum renitens, dura, & mole crescens, sed eleuari simul offenderetur; Verùm tamen est, quod quando cor ultimò cessabat à vigoratione, tunc primò non obseruabatur vigoratio auricularum, sed ea intercedebat morula, qua ambæ vigorationes, & auricularum, & cordis perficerentur. Inferatur ex hoc vigorationem auricularum, & cordis esse successiuam, & non eodem tempore insequi, prout enim in vigoratione auricularum sanguis propellitur, si eodem tempore vigoraretur cor, quomodo posset recipi sanguis ab auriculis demissus, dum in vigoratione cordis valuulæ triangulares clausuram formantes impediunt, ne sanguis retrocedat ad auriculas?

Vigorationem cordis eam voco; qua cor ipsum, utpotè musculus est, tenditur, in qua tensione, cum mole crescat substantia muscularis, necessario ventriculorum parietes coguntur a mplexari,

plexari, vndè tanquam à prælo sanguis ab auriculis demissus propellitur in arterias: Quapropter dum vigoratur cor, tenditur, eleuatur, & durum apparet, & tunc systoles venit, dum verò flaccescit, elongatur, concidit, & molle redditur, tuncque diastoles consequitur.

Fundamento huius obseruationis cogor omninò asserere admittendam non esse eorum opinionem, qui, duce celeberrimo Harueo, credunt, ventriculos cordis dilatari à sanguine per venam cauam propulso, ita vt ex distractione fibrarum muscularium cordis facta ab eodem sanguine sequatur spontanea contractio: Nàm cum immediatè à sanguinis transfluxu ab auriculis ad ventriculos insequatur cordis vigoratio, cumque notabilis morula intercedat postquam cor cessat à vigatione, priusquam auriculæ vigorari incipiant, signum elicitur plùsqvam probabile immediatè ventriculos cordis sanguine non impleri; Quapropter capacitas eorum est concipienda non à sanguine propulso, sed à cessata vigatione, per cuius desinentiam, cum mole decrescat cor, videtur manifestum periferiam ventriculorum ampliari tantum per desinentiam vigationis, & non per sanguinem à vena caua propulsum, hoc nimirum fundamento, quod sanguis ab auriculis propellitur ad ventriculos, quando iam ventriculi dehiscunt per vigationis desinentiam.

Neque de facili admitti potest opinio Doctissimi Borelli, qua ratus fuit immediatam causam motiua cordis esse ebullitionem fermentatiuam tartarei succi excitatam à commistione succi spirituosus à neruis instillati, taliter tamen, vt cum per strictissimas neruorum cauitates spirituosus succus demandetur, difficile est ob angustiam talem succum liberè effluere posse, quapropter guttatim effluens, maximèque cum supponat fluorem spirituosum aliquatenus viscidum esse, est in causa, vt interrupto tempore ebullitio, & displosio sequantur, vndè ictus cordis momento absoluatur, & deinceps quiescat, quousque secunda vice gutte effluentes iterum ebullitionem promoueant, & sic successiue: Nam primò spiritus animalis, seu succus spirituosus cerebri minimè est concipiendus viscidam redolere indolem, cum nictu oculi depræhendamus quamcumque vigorare partem ad nutum voluntatis; Secundò multæ propemodum sunt propagines nerueæ, exque infinitæ, quæ à trunco paris vagi cordi inseruntur, per quas propagines concipiendum aliquid spirituosus continuò ad cor demandari: Tertiò eadem oriretur necessitas

interrupti motus spirituum per alias exilissimas propagines nerveas : Quartò posito , quod per cylindrum aqua effluat guttatim , tamen non dabitur guttarum ordinatus discensus , vnde multò minus poterit dari , si guttè emanabunt à pluribus cylindris : Quintò debemus concipere quancumque partem debere seruari in suo tono , consistente in robore quodam per continuatam iugis emissionem spirituum intrà fibrarum interstitia . Quapropter non tam de facili poterit quis persuaderi spirituum accessum ad cordis muscularem substantiam esse interruptum .

Hisce non admissis opinionibus , quæ inter eas , quæ proferuntur probabiliores censentur , nostram tenemur describere , quā tenemus potissimum in hoc fundatam , quod sanguinis motus per cordis substantiam non sit continuus , adeoque cum innuerimus systolem in vigoratione consistere , media qua vigoratione mole crescentes quæque versùs fibræ musculares cordis sunt in causa , ut ventriculorum parietes amplexari cogantur , sanguinisque promotionem ad arterias compellant ; & Diastolem fundari in desinentia vigorationis , ita ut laxatis fibris muscularibus cordis , dehiscant ventriculi , & consequentiù sanguini propulso facilis concedatur ingressus (Quin admittamus à sanguine promoueri dilatationem auricularum , cum nulla detur resistentia iisdem in auriculis , ut eam superare debeat potentia sanguinis) inficiari haud posse suspicor vigorationem promoueri , dum sanguini iter conceditur per substantiam cordis musculare , & desinentiam vigorationis insequi à feriato motu sanguinis per eandem substantiam cordis muscularem . Et ut ordine procedam ad id comprobandum hoc vnum aduertere est , quod dum cor manet in systole , hoc est in statu vigoriatio , sanguis propellitur à dextero ventriculo in arteriam pulmonicam , & à sinistro in arteriam magnam , dum autem manet in diastole , hoc est in desinentia vigorationis , sanguis à vena caua dexterum ventriculum subit , & à vena pulmonica sinistrum ventriculum ingreditur . Igitur dum cor manet in systole , sanguis tamquam à prælo propellitur in arterias , propterea sicuti sunt in statu receptiuo arteria pulmonica , & arteria magna , ita in statu receptiuo debet esse arteria coronaria : Et dum cor est in statu vigoriatio , hoc est in systole , non est in statu receptiuo , adeoque necesse sequitur , ut ferietur motus sanguinis ad cor in vena caua , & vena pulmonica , & per consequens in vena quoque coronaria .

Quapropter certum est ex lege circulationis in cordis sy-
stole sanguinem cogi intrâ arteriam coronariam, eiusque motum
feriari in vena coronaria; & in cordis diastole sanguinem prop-
pelli per venam coronariam, & feriari per arteriam coronariam.

Hac evidenti firmata hypotesi, suspicor omninò, quod quâ-
do cor est in vigoratione, sanguis propulsus in arteriam corona-
riam subire minimè valeat interstitia, & vt dicunt multi, vesic-
ulas fibrarum muscularium, quia istæ redditæ rigidæ, & tensæ,
adeòque capacitatem non obtinentes, non sunt in statu, vt su-
perari valeant à sanguine propulso in arteriam coronariam, imò
suppono tunc promoueri propulsionem intrâ venam coronariam
illius sanguinis, qui fuerat causa vigorationis, eo modo, quo om-
nis humor exprimitur, quando lintea madida contorquentur, à
qua tamen vena coronaria non promouetur motus ad cauam, nisi
quando cor desinit vigorari, quia tunc solum datur exitus per
illam, in caua namque propè cor feriatur motus fluidorum in sy-
stole, quia clausum est ostium auricularum.

Si igitur in vigoratione cordis sanguis ab arteria coronaria
non propellitur ad interstitia fibrarum, & in vigorationis desinen-
tiæ sanguis non suffunditur à sinistro cordis ventriculo ad arteriâ
coronariam, colligo per demonstrationem mœchanicam sangui-
nis môtum in ingressu ad arteriam coronariam non esse conti-
nuum, & per consequens esse interruptum per cordis substantiâ,
quia exitus debet compensari ab ingressu: Si igitur ingressus non
est continuus per arteriam coronariam, continuus non erit e-
gressus per venam coronariam, adeòque continuus non erit mo-
tus per substantiam muscularem cordis, ad quam suppeditatur
ingressus per arteriam coronariam, & à qua promouetur egres-
sus ad venam coronariam.

Cùm ergò à sanguine tamquam vno ex constitutiuis ferme-
tatiua vigoratio promoueatur vna cum spiritibus animalibus
(Nullus enim hospes est in chemicis, qui non videat ex varijs
permixtis liquoribus variam insequi luctam, agitationem, & tom-
motionem) Ni dicere velimus, fibras cordis tendi, abbreviari,
eleuari, & duras fieri in systole, quatenus cunei adinstar partic-
ulæ sanguinis subeuntes interstitia fibrarum, eas vectis adinstar
distrahant, & eleuent, omninò concludendum ex sanguinis in-
terrupta periodo intrâ cordis substantiam, reciprocum motum
cordis vigorationis, & desinentiæ vigorationis promoueri.

His positis omninò concipiendum, quod in successiuis vigo-
ratio-

rationibus semper antecedens promoueat motum sanguinis ad vigorationem subsequenter v. g. dum fit cordis vigoratio A, sanguinem per arteriam coronariam promouet pro vigoratione B, in qua vigoratione sanguis per eandem arteriam coronariam cietur pro vigoratione C, & sic de singulis.

Non inferendum tamen ex hoc, si à sanguine promoueretur vigoratio, debere hanc esse continuam, & non interruptam, quia in vigoratione cordis tunc sanguis subit arteriam coronariā, nam vigoratio cordis non fit à sanguine, dum cietur intrā arteriam coronariam, sed dum ad fibrarum muscularium cordis interstitia propellitur. Cum igitur in vigoratione cordis sanguis non ingrediatur substantiam muscularem cordis, quæ dum manet in ea tensione, nullus conceditur fluidorum ingressus, cum plus valeat resistentia fibrarum, quam potentia sanguinis, sequitur, ut eo tempore, quo cor vigoratur, tantum intrā arteriam coronariam sanguis iter obtineat, à qua tamen arteria coronaria suffunditur intrā substantiam muscularem cordis, quando subsequuta desinentia vigorationis, potentia sanguinis per motum peristalticum arteriarum superat resistentiam illam leuissimam, quam solum importat tonus fibrarum.

Si quærat aliquis, à quam causa vigoretur cor, cum sanguis subeat ventriculos cordis priusquam per vigorationem propellatur per arteriam magnam, & per consequens ad arteriam coronariam ad vigorationem promouendam, respondeamus in cordis rudimento initiari motum tremulum, & sine ordine ab illo puncto saliente, à quo cor resultare omnes fatentur: Cum enim bene non sit organizatum cor, necesse sequitur, ut inotu ordinario haud possit cieri; verum quia exigit necessitas, ut cor incrementum obtineat, & simul moueatur, euenit ex hoc, quod quemadmodum iter augmentatiui humoris diuersimodam obtineat viam, ab ea, quam seruat, dum cor est organizatum, cum non dum viæ perfectæ supponatur, sic motus debet concipi promotus à diuerso principio, à quo concipimus promoueri, dum est perfectum.

Ideò autem reor esse necesse, ut cor moueatur motu saltem palpitante, quia quemadmodum ad nutritionem promouendam requiritur, ut à corde sanguis dispensetur, sic pro incremento partium in embrione (suppono enim in semine partes omnes latitare in minimis, cum ab ovo animal quodcumque resultet, unde mirum non est, quod in Orgijs Bacchicis consecratum fuerit ouum,

ouum ; referente Plutarcho, tanquam primordium cuiuslibet generationis debet concipi ab ea parte, in qua punctum est saliens ordine confuso, quaquaersus dispensari nutritiuas moleculas, easque iterum appellere confuso motu ad idem punctum saliens; Nam prout media cordis præssione particulæ sanguinis volatilitatem obtinent, quatenus in minima scinduntur reticulares sanguinis moleculæ ignificis particulis imprægnatæ, quæ cum idem sonent, ac vitales, talem motum obtinent, vt manuteneant in debita volatilitate, & fluiditate humoralem massam coagulationibus obnoxiam, quando motus intestinus feriat, vel retardatur quidquid dicant alij, sic vt eodem in embrione sequatur ordo nutritionis, & incrementi, debent particulæ aptæ ad id exequendum perfectionem aliquam nancisci ea in parte, vbi punctum cernitur saliens, quod non in alio consistere credimus, quàm in elasticitatis caractere promotò ab Æthere, à quo fit successiva eleuatio eius. in quo est, & non continuata, quia habet actiuitatem attollendi, sed non substinendi, cum possimus aliquando nos ipsi pondus eleuare, sed non substinere: Indè tamen sequitur, vt subsequuto fluidorum ordinato orgasmo, & organorum perfecta structura, incipiunt paulisper, & quasi ex habitu ordinationes regulatæ motus promoueri, quæ pluries, pluriesque repetitæ ordinem naturalem constituunt, vt eius recessum in morbosum omninò, & præternaturalem experiri sit necesse.

Exemplo circulationis sanguinis per cor in foetu mea firmabitur meditatio, dum in eo ordo circulationis non seruatur, quemadmodum in enixis, in quibus si sanguis à vena cava in dextrum ventriculum cordis propellitur, & à vena pulmonica in sinistrum, dum cor manet in diastole, prout quando manet in systole à dextro cordis ventriculo transfertur in arteriam pulmonicam, & à sinistro in arteriam magnam, sic in foetu existente in vtero sanguis à vena cava propellitur per foramen ouale in venam pulmonicam, & sic in sinistrum cordis ventriculum, & ab arteria pulmonica per aliam vnionem in arteriam magnam. Igitur ex hoc probabilissima stabiliri potest assertio diuersimodè cieri sanguinem per cordis substantiam, quando manet in primo rudimento, ac quando fuerit perfectum cor: Vndè si pro nutritione, & incremento per arteriam coronariam non propellitur, quia non dum cor est fabricatum, sic non erit necesse, vt per arteriam coronariam sanguis in substantiam cordis propellatur pro motu regulato initiando;

APPENDIX

De motu Arteriarum, & Pulsuum differentijs simplicibus.

AD ILLUSTRISSIMUM DOMINUM

CVRTIVM TRESANVM.

IOANNES BAPTISTA SCARAMUCCIUS.

Non me lätet, Sapientissime TRESANE, naturam unicuique nostrum, ut refert Plutarchus, duas dedisse aures, & unam linguam, quod pauciora loqui debeamus, quam audire; At quale piaculum erit, si Tibi Amabilissimo Præceptoris tesseram hanc scribere coegerit philosophandi libertas, ut ne dum sis mihi Magnus Apollo, cum non desint, qui exules à Theorica alea, cum eius limina nunquam attigerint, Theoricas dissertationes abijcientes ex Libro, ut dicit Plato aliunde docti, aut in medicamentis collapsi se medicos factos esse putant, cum nihil in arte sciant, sed quia oculos habes artis, valeas, eo quo soles sapientissimo animi candore, quid sentias prænarrare.

Nec extrà aleam discedere videbor, si aliquid meditatum, proponam de arteriarum pulsatione, & de pulsuum differentijs, cum de motu cordis sermonem iniuerimus, & ut à pulsatione exordium depromam, observo à pulsifica facultate, quatenus communicata arterijs à corde easdem arterias moveri lancitum fuisse à Galenicis; Harueus tamen ratus est ab impulsu sanguinis arterias cieri, dum crediderit eas dilatari, quia implentur utris adinstar; Valeus, & Bartolinus deduxere motum arteriarum à sanguinis impulsu, & à facultate, quam non à corde communicari sentit Brachius, prout illi rati sunt, sed insitam esse arterijs affirmat; Arterias expandi censet DelaBoe. Silivius à sanguine per cordis contractionem in ipsas expulso, easdemque constrihi credidit à spiritibus animalibus fibras anulares implentibus, & sic cavitatem earum angustantibus, verum cum facultatis nomen, ut diximus, nihil importet, omnino fatendum arteriarum motum

tum promoueri à debita structura earundem, & à sanguine, ita vt totum peragatur iuxta leges mœchanicas.

Vt enim promoueatur motus dilatatiuus arteriarum, debet fieri repletio sanguinis intrà arterias à corde propulsi, & vt fiat motus constrictiui, debet dari exitus sanguinis extrà arterias; Dilationem arteriarum communiter vocant diastole, earundemque constrictionem vocant systole; Hinc est, quod cum eodem tempore perfici nequeant hi motus, oportet vt repletio arteriarum præcedat, & deindè subsequatur excretio. Verùm tamen est, quod dum è corde sanguis propellitur in arterias, minime sequitur, vt ex tali portione omnes impleantur, nec in constrictione omnes depleantur, Cum enim contineant probabiliter quartam partem sanguinis, cum à corde propulsio fiat ad vncias, non videtur congruum ex his posse impleri totam arteriarum capacitatem; Cum ergò arteriæ sint fistulæ molles, licet sanguine sint plenæ, sunt tamen dilatabiles, quia non sunt plenæ ad turgescentiam, vnde potest fieri conceptus, quod copia sanguinis propulsa ab extremitatibus arteriarum correspondeat quantitati à corde propulsæ intrà easdem arterias: Propulsio autem extrà arterias non fit nisi per constrictionem arteriarum; nam si sanguis proprio motu foràs propelleretur, vel id faceret ratione grauitatis, vel ratione rarefactionis, non ratione huius, quia nulla differentia cernitur inter sanguinem arteriosum, & venosum, non ratione grauitatis, quia vbi non adest decliuitas, fluor non delabitur ob molis grauitatem, cum ergò sursum per arterias procedat, & diffuat, videtur, quod debeat fieri recursus ad organi structuram, & ad molem sanguinis.

Posito ergò, quod in dilatatione copia sanguinis augeatur, & in constrictione minuatur, cum fibræ arteriarum, prout aliarum fibræ musculorum, tendinum, intestinorum, membranarum, &c. resistent distractioni, & vim habeant se contrahendi ad instar arcus distracti (videmus namque fibras omnes in situ naturali locatas violentam pari tractionem, vt si scindantur, spontè contrahi, & abbreviari cernantur) sequitur quod sanguis è corde propulsus arteriarum repletionem maiorem promoueat, quæ repletio sequi non potest absquè earundem fibrarum transuersaliu violenta distractione: Si enim patiuntur distractionem in statu naturali, quando arteriæ vltèrius sanguine replentur, tunc ampliata cauitate, multò magis fibræ transuersales elongari debent, vnde violentiorem patiuntur distractionem, per quam dilatati-

uis sequitur motus, nempe diastole. Verùm cum à violenta distractione ex naturali necessitate ob vim elasticam fibræ contrahantur, sequitur, ut sanguinis potentiam vincant, vnde cum decurrantur, necesse est, ut arteriæ constringantur, & sic per necessitatem mœchanicam sanguis foras propellatur, quam contractionem systole vocant.

Obiter noto fluores omnes è visceribus eijci medio motu peristaltico, qui talis dicitur per vermicularem fibrarum motum, quæ fibræ distrahantur à fluore comprimente, & contrahantur media elasticitate; Hinc non nisi per eundem motum sanguis cietur in venis, in quibus licet fibrarum supponatur motus peristalticus, tamen non est pulsificus, uti in arterijs, quia in his maiorem patiuntur fibræ distractionem cum procedat transitus ex lato in angustum; vnde fortior est vis elastica, maximeque cum duplici tunica insigniantur arteriæ, que non patiuntur ampliari uti venæ: in quibus motus procedit ab angusto in latum, & sic cum in ijs maius spatium inueniatur, nulla est necessitas, ut distrahantur violenter.

Aduerto insuper motum fluorum intra arterias triplicis considerari generis rectum nempe, lateralem, & intestinum. Per rectum cietur motus sanguinis à parte ad partem successiuo itinere; Intestinus manutinet in fluiditate totam compagem massæ humoralis, quæ descisceret ab eadem fluiditate, nisi particulæ componentēs fluidum continuum conseruarent motum; Lateralis verò distractionem fibrarum promptius promouet; Nam prout in sanguine circulante per arterias motus iste lateralis est actiuior in arterijs, quàm in venis, sequitur ex hoc, ut per talem distractionem arteriæ pulsant, secus verò venæ: Dum enim sanguis in arterias propellitur, cum motus continetur in his semper ex lato in angustum, sequitur, ut celeritas impressa, cum non possit æquali proportionē propagari per rectum, transuersaliter vim faciat.

Si igitur pro maiori, vel minori copia sanguinis fibræ arteriarum magis, vel minùs dilatantur, & prout magis, vel minùs dilatantur, maior, vel minor sequitur contractio, videtur, quod diuersitas pulsus nempe distractionis, & contractionis, non nisi ad diuersam sanguinis copiam, eiusque diuersum motum, nec non ad diuersam arteriarum structuram sit referenda.

Etenim cum ex communi consensu, ut etiam Præclarissimo Sennerto visum est, in omni motu debeat considerari mouens, quod

quod mouetur, spatium per quod mouetur, tempus, quo mouetur, & quies inter duos motus, satis apparet manifestum eas, pulsum differentias constitui, quæ dicantur

vehemens, & debilis

ratione mouentis.

durus, & mollis

ratione instrumenti moti.

magnus, & parvus

ratione spatij.

celer, & tardus

ratione temporis.

frequens, & rarus

ratione quietis.

Quin discedamus à legibus mœchanicis, hanc pulsum causam conciperem, nempe quod posset referri.

Vehemens, & debilis ad copiam sanguinis, & ad structuram arteriarum; Nam cum arteriæ distrahantur à sanguine, sequitur, quod si copia sanguinis maior, quam par sit à corde propellatur, maiorem faciant arteriæ resistantiam sanguini dilatanti, vnde vehemens obseruetur ipsa distractio: Quod si minor, quam par sit, copia à corde demandetur, vt maiorem resistantiam faciant arteriæ sanguini, sequitur, quod debilis sequatur distractio.

Durus, & mollis possent referri ad arteriarum structuram, nam si fibræ arteriarum plus naturali rigidæ, & tensæ sint, sequitur, quod dum distrahuntur duram impressionem præferant, quod si laxæ sint, & flexibiles non nisi mollem contactum imprimant.

Magnus, & parvus copiam sanguinis agnoscunt, eo quod arteriæ maiorem distractionem à maiori copia sanguinis obtinent, & sic maius spatium circumscribunt, è contra verò ex minori distractione ob minorem sanguinis copiam minus spatium describitur.

Celer, & tardus motum sanguinis sequuntur; Quò enim citatior est sanguis à corde propulsio, eò celerior est arteriarum distractio, & quò longior, eò tardior consequitur.

Frequens, & rarus ad motum sanguinis, & ad structuram arteriarum referri possunt; Nam prout frequentia sanguinis decursus frequentem promouet distractionem, sic arteriarum prompta, & subita sequitur renitentia, dum contrahuntur ob fibrarum nimirum vim elasticam actiuorem; Sic è contra rarus sanguinis cursus raram promouet distractionem, & vis arteriarum elastica debilis raram deducit contractionem.

Cæterum aliæ respectiue pulsum differentię omnes ad dictas reducuntur; Vnde prout præcipua est æqualitas, vel inæqualitas,

qualitas, sic cum hæc ad æqualitatem, vel inæqualitatem copię sanguinis, motus eiusdem, & motus arteriarum adaptentur cui-libet euaadet manifestum alias differentias ad hæc tria reduci, nimirum ad diuersam copiam sanguinis ad diuersum motum eiusdem, & ad diuersam structuram & motum arteriarum.

Hinc noto vim fibrarum contractiuam maximè à vi spirituum animalium elastica coadiuari, cum per arteriarum fibras disseminentur nerui, præcipuè recurrentes à pari vago, vt Anatomici proferunt.

Quamuis verò motus cordis immediatè non promoueat pulsationem arteriarum, eò quod dum cor constringitur arteriæ dilatantur, & dum cor dilatatur arteriæ constringuntur (oportet namq; vt dñ cor constringitur, & sic sanguis propellitur pleno gurgite ab arterijs accipiatur, vnde arteriæ tunc debent ampliari: Imò ad quid valvulæ mitrales in summitate arteriæ magnæ, nisi inferuient ad inhibendum sanguinis regressum versùs cor, dum ipsæ arteriæ constringuntur, quò tempore si cor constringeretur, essent superfluæ) tamen motus cordis saltem mediatè concurrit, quatenus per eius motum sanguis ad arterias propulsus modificatur, & respectu copię, & respectu motus sanguinis, à quibus concurrente arteriarum structura, pulsus dependet.

Hinc est, quod quemadmodum in delinientia vigorationis cordis diuersa considerari potest sanguinis compages, quatenus ex nimia fluiditate, vel lentescencia promptius, vel difficilius possit auriculas cordis subire, & in eadem vigoratione potest sanguis vel facilius, vel difficilius, propelli, sic motus dilatatiuus, & constrictiuus arteriarum potest diuersificari, si enim in copia à corde sanguis propellitur, in copia quoque debet recipi ab arterijs, si lento cursu, lentè recipitur, si motus cordis deturbatur, deturbato motu cidentur quoque arteriæ, quia re vera sanguis à corde propulsus diastolem arteriarum promouet, vno verbo ex irregulari cordis motu, quia irregularis subsequitur in arterijs, arteriæ ipsæ aliquid pati natæ sunt.

Non inficior tamen lædi posse motum arteriarum, quin lædatur motus cordis, dum ex irregulari spirituum animalium motu nerui inserti in arterijs, vel eas circumuallantes possint strangulari, & sic à motu feriari ipsæ arteriæ, vel in vnica pulsatione, vel in pluribus, cumque motus sanguinis in orbem ne dum à cordis præssione, & ab arteriarum motu peristaltico promoueatur, sed etiam ab aere, qui media sua elasticitate cogit

qua-

quaquaversus expandi granula sanguinis rotantia, sequitur, vt coarctata sanguinis compage media dispositione coagulatiua, siue ab acidis promota, siue à partium volatilium penuria, præpediatur aeris elasticitas, quæ cum non valeat superare potentiam molecularum sanguinis, quæ moleculæ tanquam ab hamosis particulis existunt irretitæ, est in causa, vt non benè regulato motu intestino, & locali fluidorum, arteriæ ipsæ irregulariter distrahantur.

Plura referre de his non vacaret occasio, nec materies, quam ad nauseam vsque proferre non permittunt practicæ occupationes; Interea tuæ eximie Virtuti, cui me multum additum profiteor, appendicem hanc volui directam, ne umbram metuat Aristarchicæ sectæ, quæ cum plus valeat à Viperis (à quarum corde scribendi occasionem deprompsi) carpere venenum, quàm ego antidotum, Te protegente calamus in dies poterit vigorari

*Quamvis tonet ruinis
Miscens aquora ventis.*



SENOGALLIÆ, Ex Typographia Episcopali,

Apud Franciscum Antonium Percimineum. M. DC. LXXXIX.
Superiorum Permissu.

MC

